

皇朝經世文續編

工政十一 各省水利止

費王芥子涇水志後

兩修都江堰工程紀略序

鑒合州鉅梁虬門一灘記

籌辦襄河隄工疏

查勘江漢隄工疏

疏分漢水支河說

請查瀕湖私埭永禁私築疏

樊城新隄記

遵 旨查明據實縷陳疏

開濬南湖議

濬湖州溇港議

治漳說

安清

强望泰

强望泰

林則徐

林則徐

江開

賀熙齡

賀熙齡

彭玉麟

劉汝璣

劉汝璣

葛士達

上海葛士濬子源輯

工政十一 各省水利上

書王芥子涇水志後

安清翹

芥子謂涇水污濁敗苗有害無利必拒之使一滴不入而後可誕甚因性盡才豈有無利之水哉關中入水涇利最著秦漢以來利或大或小未有言涇水無利且有害芥子一言抹殺大端有二曰功費大民力瘦耳夫使功費出於朝廷當不計值即使無成亦不過將金錢散諸小民有何大害如關中之金勝等寺費十數萬之功作無益耳移以興涇水之利所用綽綽然有餘至於民力之疲苟心存利民則散數十萬之功費民將踴躍從事藉以得利又何疲之有不然彼車馬之征矢役之征疲民者多矣豈未之思耶有明項襄毅曾言用涇水當不惜費不求近效今因惜費又汲汲眼前功效遂使涇水受誣正是未盡涇之才不能用其才而謂人不可用韓信所以去項用兵威逼鋤而去之羅紹威所以致悔於九州之鐵彼龐士元蔣琬非百里才若非諸葛知之則將以爲不勝百里之任也

近年涇水之不可用因河底太深難引入渠非其濁之謂也芥子不知甯夏用黃河濁水灌稻自漢至今開渠愈多食利愈溥豈黃河之濁可用而涇濁不可乎此則不虛心之過也寬夫先生從此悟到不盡人才如畢秋帆以有用之金擲無用之地且多用違其才致釀成白蓮教匪之變立言有益於國故亟登之以爲炯戒

兩修都江堰工程紀略序

強望泰

余聞之弗慮胡獲又聞慮而後能得此雖在一身一家之事猶宜厝注周詳矧都江堰分千支萬派溉十四州縣之田活億萬生靈之命是烏可不熟思審處蘄盡有司之職也哉余荷先孝忠烈公庇廕自甲戌蒙 睿皇帝欽賜科第旋由翰林改授中書奉職十年深以析薪弗克負荷爲懼矢勤公事幸而無愆丁亥仲春選授成都府水利同知孟冬莅任周歷各堰至索橋上內外江分水魚嘴處見河口寬四十餘丈河身自六年舊河口起至寶瓶口訖均僅寬四五丈至十二丈不等河岸一帶積沙石踰數丈河中爲沙石淤塞更甚各堰隄亦衝刷損壞者過半因延訪紳耆披閱志乘細繹深思求所以治之之法覺稍有會通於深淘灘低作堰之本義考宋郡縣志云秦太守李冰鑿離堆開二渠一由永康過新繁入成都謂之外江一由永康過郫入成都謂之內江按灌在漢屬縣屬蜀置都安宋齊徙汶山郡始此唐置盤龍縣尋改名導江宋太平興國三年始改永康軍元改灌州明始廢州爲縣則宋之永康卽今灌治也其云深淘灘者所以防順流之沙石不使淤入內江也低作堰者所以使有餘之渠水便於洩入外江也推明其義因於是冬興工卽高加河防廣作埂籠深去河底之積沙低砌隄之層數戊子春夏察看水勢大字之法覺更有驗旋於各堰一律如前修治竊冀如此興修數年後此堰可復古制一勞永逸而不意兩修後余卽有懋功之行因思天下事好奇者矜新法耽逸者墮先型及事不成則皆歸之於造化蓋堰工不遵六字脩歷有年所矣余不敢諉之於天不得不師之於古爰將兩脩各工紀略於左以誌千慮之一得後之君子或能諒此愚誠焉

一七年淘挖內江河口長八九十丈寬十五丈均深五尺餘寸八年察看河底較七年約深二尺餘寸今河底較上年約深三尺餘寸

一挖去古河內沙堆約深三尺寬十五丈長一百餘丈使水可引入古河新開河口可以漸次淤塞

一鎮夷關脚下七年挖深五尺現一石與山連圍圓約一丈許詢之胥役僉云每年若見此石卽不淘挖余諦審其言不確乃命石工鑿去一尺餘寸使與河底平八年河底較鑿去石又矮一尺又鑿去二尺五寸使與新河底平

一緊對臥鐵碑下河底七年掘深二尺現出木椿與河底平八年河底較木椿低一尺五寸余命將木椿鑿去一尺五寸使與河底平察省志此處有明時豎立鐵椿數根余淘覓數十日不見因亦豎鐵椿一根於河中南去岸五丈二尺北去岸四丈六尺顯與淘深之河底平豎處亦與臥鐵碑相對

一關雞臺下向有淤沙一堆高計丈餘周圍約六丈許余命挖與水面平但其旁係深潭七年淘挖時恐人夫將沙石棄潭內被水衝復起仍成淤集因逐日親督工命擔棄遠岸役夫中有老而黠者跪余而云伊在堰淘挖三十餘年此處沙石歷來盡棄潭中余知其譎卽昏夜微服諂訪未聞有云頻棄潭中者但察實時已傾潭中大半矣以致八年此沙復堆淤寬六丈高五尺余仍照七年督挖去盡不令棄片石於潭中是年此處河底較七年挖低二尺餘寸因於北案石上深淘灘低作堰六字旁添刻水則十畫初畫令與河底平俾農民便察此處深淺也

一寶瓶口河形舊寬十二丈七年察量僅寬七丈餘余於是年展寬一丈長二十餘丈深約五尺八年又展寬二丈長四十丈深五六尺不等仍復古制使水出口勢得舒暢並將所挖沙石置北案城脚下堆砌成坎上坎約高一丈餘寸寬三丈長三十餘丈下坎約高四尺寬一丈三尺

一走馬河龍橋下本有河工開堰長云數年來並未淘挖余於八年仍添挖河方七百餘數又上漏罐逼水壩南岸向無挖工余見此處沙淤甚高亦添挖河方四百餘數又下漏罐轉灣處余見河身淤窄亦展寬一丈

許以上七則均遵淘深灘法也

一自鎮夷關起至人字隄止河身均展寬一丈五尺

一飛沙堰係歷來古河七年此處橫鋪籠裝至十數層又加裝以篋子籠因河底高籠亦作高夏間水漲余親往察見水不能洩入外江當卽割籠一層使洩其餘水八年河底挖深因將籠亦低作較上年矮去數層此遵低作堰法也

一人字隄邊漩坑向來用籠滾填齊水面方用橫鋪填心籠二三層裝砌上又用搭包順籠蓋面七年望見此作甚不得法八年余令堰長夫頭用篋繩繫籠頭中尾三處籠入水時令人將繩撻緊使籠至坑內不致倒臥懸栽亦不致溜入潭內籠離面約三尺卽令泅夫下水用竹篋將籠迴環密縫出水面時仍照水籠裝鋪順籠六層又裝鋪橫籠一層上始用搭包順籠蓋面親督九日而工始畢較之上年似更堅固也

一內外江各魚嘴籠盡以竹篋穿繫夏水可免衝刷至內江大小各堰籠工相勢制宜俱略有更換處

一內外江各堰沙石淘挖均係傾棄遠岸水漲時均不致衝流仍集河內

勢有不能

一太平橋魚嘴上沙石積高數丈走馬河南岸沙石亦淤堆數丈鎖龍橋上下沙石亦俱積滿兩岸盡是居民田舍察俱是向來河灘也

一伏龍觀南岸察係舊日考武箭道因乾隆間人字隄開口此處被水衝刷箭道遂移東郊余於其處植柳八十二株欲爲將來辦工界限也

一關雞臺對岸有大沙堆余於八年工竣後捐廉將沙雇夫挑置人字隄下與龍基平集約寬二十丈長十六丈深三五尺不等竊謂沙堆一去洩水易入外江隄後身高隄工可以永固也

一自鎮夷關對岸沙堆起至現挖之沙堆止共約長數百餘丈盡墮隄後堰雖低作恐仍無益余以有志未逮而去所望繼余而來之賢執事將每年新淘沙石盡傾遠岸低處將舊堆沙石量力漸挖使低堰仍低作方合古低作堰之法余固知糠粃在前珠玉在後毋煩行者之灌灌而杞人之憂有屢欲已而不能已者凡以效矇瞍之誦也若謂慮遠說長則吾豈敢則吾豈敢

鑿合州鉅梁虬門二灘記

強望泰

合陽爲三江總匯之區涪水發源於嶓嶸來自州西宕渠發源於萬頃池來自州東嘉陵分派於陝之白水來自州北浩浩湯湯合流於城之會江門外風馳雨驟茫無際涯貫江沱迴沔漢控引衆川舳艫千里通志稱爲蜀口要津良有以也丙申秋予奉憲檄權篆斯土賈舟錦水東下渝城一葉輕帆隨波蕩漾數年來浮遊宦海可作如是觀也繼而泝流至合經虬門涉鉅梁洪濤洶湧怪石嵯峨激蕩淙淙舟人大恐幸無風伯作劇獲以無虞抵合後訪疾苦於民間父老卽述及二灘之險久爲州患予爲扼腕久之或又謂予曰使君莫慮灘心險闊過人心此尙平蓋言民情險而健訟推波助瀾較灘水爲害尤烈也予無撓轡澄清才上愧不能廣教化美風俗以端化源下恐不能束吏役息訟獄以挽濁流朝夕徬徨惴惴焉惟不稱職是惕乃禁其輩凌因勢利導葢事數月安堵而居于竊喜民俗之可化而憂灘險之未平也公餘之暇駕漁舟察看二灘形勢鉅梁距城三十里江面約寬六十餘丈中有鉅石如梁橫亘滿江前牧張君兌和於江左鑿一漕口通上下舟江右猶留石梁三十四丈夏秋大汛水石相激濁浪排空撥運稍疏檣傾楫折兼以巖畔峻峭嶺道才予登涉既艱挽流無

力行者傷之由鉅梁而下一千里許卽爲虬門江邊石筍長十餘丈高七八尺寬二丈八尺有奇江中有巨石五一丈至六尺至二三丈不等狂瀾怒奔聲聞數里輕楫迅帆出沒濤瀾蕩瀾中巉崖屹立盡爲難矣自有一灘以來沉淪者不知凡幾予自擊心傷未敢憚勞爰乘水落石出鳩工疏鑿於鉅梁之右別開漕口長二十五丈有奇進口寬六丈五尺深七尺出口寬八丈六尺深一丈一尺並將縈道地勢酌量開通坦如也虬門數險亦一律鑿平始事於冬之仲月竣事於春之季月工徒廩食胥視私役輕騎減從日勸旬勞統計費貲一千三百餘緡無絲毫累及我民時雲根掃盡水淨沙明方之舟之波濤不驚商旅游觀交口稱頌予曰此守土之責也區區者又何足云顧有不能已於言者予代庖之日無多此外險灘不少願後之牧斯土與居斯土者隨時隨鑿量力修鑿平千百年崎嶇之石安億萬人往來之船不獨爲合人除患而并爲天下後世之人除患其保全更無涯涘也

籌防襄河隄工疏

林則徐

竊臣前因大汛期內各屬隄防險工林立卽於六月間附片奏明出省督防在案因由漢陽派流而上經歷漢川沔陽天門潛江京山荊門鍾祥襄陽各州縣將南北兩岸隄工量明丈尺分爲最險次險平穩三項以便稽查防護其河灘寬遠隄膝高厚者列爲平穩一項若灘窄溜近而河形尙順隄雖單薄而土性尙堅者列爲次險至迎溜頂衝或對面沙嘴挺出隄前嫩灘塌盡以及土性沙鬆屢築屢潰之處皆爲最險要工逐年必須加培大汛尤資守護且查襄河河底從前深皆數丈自陝省南山一帶及楚北之鄖陽上游深山老林盡行開墾栽種包穀山土日掘日鬆遇有發水沙泥隨下以致節年淤墊自漢陽至襄陽愈上而河愈淺又漢水性最善曲一里之近竟有紆迴數折者此岸坐灣則彼岸受敵正溜既猛卽迴溜亦狂是以道光元年至今襄河竟

無一年不報漫潰唯所潰之處受患輕重各有不同潰在下游者輕上游則重潰在支隄者輕正隄則重如漢川以下爲漳潰尾閘本不設隄謂之廠廠自此而上沔陽高於漢川潛江天門高於沔陽京山鍾祥又高於天門潛江設使上游失事如頂漲足卽成異災故防守之道尤須於上游加意本年五月中旬漲水甚驟漫於漫隄幸上游均經保全其報潰之白魚垸長湖垸二處一係下游一係支隄情形較輕現在長湖垸業已補築完竣白魚垸亦已釘樁當飭該縣嚴催業民集費搶築六月下旬水又加長七八尺不等現在甫經消落仍恐秋汛復漲禾稼在地守護不可稍疎而尤莫要於鍾祥京山二縣查從前鍾京交界之王家營隄工潰決頻聞仰蒙 特命尙書陳若霖等臨工勘估前任湖廣總督高孚駐工督修經黃州府通判周存義建辦石壩三道挑溜護隄至今十年捍禦極爲得力上年訥爾經額在總督任內恐此工一逾固限衆心或有懈弛仍甚可虞復將該石壩三道加培高寬現任益臻鞏固惟京山第五段之張壁口與鍾祥第三工之萬佛寺兩處隄睦目下俱被大溜衝刷隄身壁立極爲險要 臣親勘之後卽飭該府縣估辦護壩並相勢築做盤頭又於迎溜各段拋填堅大塊石斜長入水追壓到底以資禦護業已設法籌辦不敢請動 帑項至上年訥爾經額奏請修復鍾祥縣第十工之劉公菴何家潭兩處潰隄共七百二十八丈並砌辦石壩各工此次經 臣親往驗收不獨如式飽雖且較原估更加寬厚似此險要地段須得有此結實工程所有賠修之署鍾祥縣知縣謝慶遠先因該工漫潰奏奉 諭旨革職留任今賠修工竣可否仰懇 天恩准予開復恭候 命下祇遵再襄陽府城之老龍石堤 臣亦親至查視甚屬堅固足資保障

查勘江漢隄工疏

林則徐

竊臣前因秋汛屆期水勢正在長發當卽親赴各屬查工督防彙經附片奏 聞在案 臣乘舟溯流而上先抵

漢川沔陽二州縣境內卽見汎水驟至業已盈隄拍岸洶湧異常查覈各處報單並量驗沔陽之仙桃鎮誌椿七月初九初十一此三日內共長水二丈零一寸漢川北岸之姚兒垸隄長一千九百餘丈香花垸隄長四千二百餘丈均因被水激蕩間段坍塌經該縣趙德轍督率垸民在於隄外排豎木椿捆柴攔護隄工加高子堰隄內趕築裏幫極力堵衛三晝夜水漸退落隄乃保全其沔陽州之隄北岸計七十五里南岸計八十五里險處不勝枚舉而周家橫隄尤爲衝要幸柴土料物皆已豫備充足資搶護又有西毛臺垸一隄形勢坐灣風衝浪激隄內忽有滲水情形甚危居民挈其家具紛紛遷避該州李兆元與前代理州折錦元均駐該處督率汎委各員集夫搶築臣適至隄上察看形勢尙可不至決裂當諭居民不必驚悸亦不可相率逃避致惑人心正當隨同地方官捧土束薪盡力守護卽可保無失事時有署沔陽州州判姚正道赤足立於水中連夜收土督夫塞漏有隙卽填防汎之委員彭鳳池亦於上下隄段來往飛催舂掘紛集該隄發漏之處遂得逐漸堵閉並未過水壑通隄內垸田一望無際皆免淪於巨浸之中實爲至幸臣復由沔陽上至天門潛江荊門又上而至京山鍾祥則皆在汎漲已過之後隄身出水較高民情極爲安貼所有各縣本屆歲修暨捐修各工除大汎以前完竣奏明先委道府驗收者此次復經臣自行覆驗外又據署潛江縣知縣甫經卸事之何渭珍稟呈近日續修工摺查係於歲修之外復經勸捐興辦如方家灣戴家嶺卸甲埠白伏垸等處月堤新豐垸皮家拐之上下霸座及石盤頭暨各垸老隄加高撐幫之工臣皆親往錐驗均係礮砌堅實足資抵禦此襄河一帶之情形也至大江水勢向以荊州府城外之楊林磯誌椿爲準自入七月以來據報初三日長水四尺七寸初五日長水二尺一寸初九日長水四尺二寸其在一日間長至數尺之水固不可謂不驟所幸旋長旋落宣洩較靈較之連日泛漲不消者卽爲有間臣由荊門州水路至荊州府之萬城隄周歷履勘本年秋汎水勢自交

白露後連日大落已比去年此刻小至一丈有零各段官役兵夫暮布星羅防護亦皆周密隨卽由荆江順流而下查看江陵公安石首監利所修土石各工雖易雖各不同辦理均尙如式現屆秋分節令水勢似已就平但距霜降尙有一月之期防護斷不容稍懈臣勘過之處卽責成印委各員實力嚴防不得始勤終怠致貽誤報安瀾外所有閱視江漢隄工悉臻平穩緣由理合恭摺具奏

疏分漢水支河說

江開

楚北之水江爲大漢次之而漢之爲患較江爲尤甚豈神禹之遇害無窮乎漢自嶓冢發源至鄖縣入楚界又數百里至襄陽岷岸非崇岡卽峻嶺夾之而下故襄陽以上無泛溢繞襄陽城北匯河南之唐白二河地勢平衍始無所制漲盛則橫流四溢巨浪滔天落則平沙浩浩水少灘多自襄陽至安陸河極寬廣安陸而下入潛江界以次而狹然兩岸相距猶里許歷天門沔陽漢川漸行漸窄僅數十丈及至漢陽之大別山入江其寬不過數丈而已夫漢之來也三千餘里收秦之漢中興安帶楚之鄖陽襄陽匯豫之南陽諸水奔騰於萬山之中泛溢於三澨之口然後安陸德安漢陽三郡之水又盡入焉水愈下而愈多河愈行而愈隘約之使不能洩其不潰隄決防者未之有也且興安漢中鄖陽三郡據漢上游山民生齒日繁老林隨在開墾山陡土鬆每過大雨沙石俱流河身日見淤塞自襄陽而下直至潛江大門以上河心墊高幾與岸等水無所容而專恃隄防以遏之是激之使怒也然則將如之何曰激之則忿分之則安漢水自襄陽而下其南岸經宜城荆門潛江沔陽至漢陽止其北岸經鍾祥京山天門漢川亦至漢陽止分疏之法不必廢田畝挾墳墓傷地脈毀民居也澤之兩岸舊有支河分洩水勢潛江之澤口迤西南流由田關歷高家場過張公嘴了角廟匯入長湖桑湖出荆川

之黑穴間歸江又由監利之福田寺間出沔陽之新隄茅江龍王廟一開歸江又由官木嶺歷監利之楊林關沔陽之戴家隄太陽腦沙湖達沌口歸江澤口以下又有蘆伏河近名縣河南流由排河渡歷監利之柳口沔陽之沈家河口入府場河出沌口歸江又沔陽則有仙桃鎮之渡口河由小石村歷李云口太陽腦出沌口歸江此五者皆在漢之南岸者也其北岸亦有二焉一爲天門牛蹄口歷田二河出漢川之麥旺嘴仍入漢歸江一爲漢川之張池口歷邵家嘴慈擔溝匯洋子港至柘樹口出潰口歸江以上支河共七道合漢口正河而入亦猶黃河之水疏之爲九以弱其勢則漢之支河未始非禹跡也禹豈遺害後世哉自被淤塞漲則舟楫僅通涸則涓滴不洩其甚者幾成平地略具河形而已冬春之間既不能填消積潦夏秋之際又安望分洩洪流近年以來愈講隄工愈多水患其故何哉尤可異者本年漢水一張上下潰隄十餘處四望樂郊盡成苦海以爲隄工之不堅固事者固不足以逃其罪然合數千里之水放之於泥沙壅塞之上不求所以分其勢欲盡驅之使由漢口數丈之壑以入江恐雖鎔金鑄鐵以爲防亦斷不能安然無事也然而疏通之費亦未易言矣奈之何哉奈之何哉

請查瀕湖私堤永禁私築疏道光五年

賀熙齡

竊惟致治之尤與利必先除害治水之道宣洩重於隄防查湖南洞庭一湖爲川黔楚粵諸水匯宿之區自應使湖面寬闊旁無壅滯則諸水易於消納上游不致泛溢自康熙年許瀕湖居民各就湖邊荒地築圍成田於是長沙湘陰益陽武陵龍陽沅江澧州安鄉巴陵華容等十州縣有曾被水衝發帑修復之官圍復有未經帑修陸續圯築之民圍嗣因居民增築無已佔湖愈多湖面愈狹是以乾隆年間經撫臣蔣溥楊錫紱陳宏謀先後奏准永禁新築倒毀私圍恭查乾隆二十八年六月十四日欽奉上諭陳宏謀奏請嚴瀕湖私築之禁一

摺所辦甚是洞庭一湖爲川黔粵楚衆流之總匯必使湖面廣闊方足以容納百川永無潰溢乃瀕湖居民狃於目前之利圍築圩田侵佔湖地而地方官又往往意存姑息不行禁止若湖地漸就湮鬱則夏秋水發之時勢必漫衍衝決爲澤國田廬之患倘或跨州連邑所在淹沒卽所有私築圍田亦安能保無衝沒利小害大誠灼然可見者著傳諭喬光烈每年親行查勘閭一二歲卽將有無佔築情形詳悉具奏永以爲例等因欽此遵行既久地方官查禁稍疏民間復多私築嘉慶七年又經撫臣馬慧裕歷勘長沙各州縣續報私圍垸共九十四處該撫准存留者九十一處創毀者僅三處雖其存留之九十一處當經該撫奏明如遇水漲衝潰不准復修然小民趨利既不肯聽其坍塌不行補築而近來地方官復意存姑息凡有私築不肯究辦上司間或委員查勘亦第受規費而去如湘陰之蓮蓬賽楊林賽傅家山上下塘等處俱係乾隆年間陳宏謀奏明創毀之私圍乃聞蓮蓬賽楊家賽二圍現今更易名色已將堤垸復修此外各州縣之違禁私築者尙復不少似此累歲加增侵佔湖地阻塞水道每遇水發之時橫溢四出官圍俱受其害田廬壞而病在民官賦虧而病在國究之所築之私圍亦歸烏有利小害大貽患無窮而且附近居民或恐其貽害於己當其私築之日率衆阻攔或以其事屬違禁間遇收穫之時乘勢搶奪以致互相爭鬪別生事端總之私圍之禁不嚴故諸患因之而起相應請 旨勅下湖南巡撫嚴禁私築每歲責成地方水利各官詳悉查勘如有新築圍田阻礙水道之處卽行創毀若有受賄存留朦混結報者查出參處庶幾私築可絕水患可除民田永賴其利矣

樊城新隄記

賀熙齡

樊城踞漢水北岸控滇黔秦蜀豫數省之衝舟車四達商旅輻輳屹然爲楚北一巨鎮而其地與襄陽相倚角二城對峙漢水中東性濁且疾唐鄧之水復自白河南注橫截漢流故其波濤激射爲害尤烈數十年來隄岸

日圯富庶漸減守土者憂之思建長堤以捍洪波而苦於費之無出也長沙鄭芝泉太守蒞襄之始卽軫念疾苦爰咨爰度日蒞工所殫心規畫集白金四萬兩有奇築土堤石堤各二百數十餘丈經始於戊子之冬告成於庚寅之夏堅密屹立湍怒不驚民用和舞建亭紀績余竊惟漢水自宜城而上寬廣者可十餘里鍾祥而下寬者數里狹者數十步而止上游之患在沙土鬆浮而無以禦其衝激之勢下游之患在於水爭地而無所容其游蕩之區故上游利用防下游利用洩今太守之護樊者得矣而下游之漂田園淹廬舍者無歲無之是惟宣洩其下游而後閭里得安全之樂卽上游亦無衝擊之虞首尾相因疏塞並舉斯在大力者總全局而圖之庶幾水患永除而水利可復也雖然始事者議不一恤私者志不固今茲隄之成也非士民之慷慨好義踴躍赴功則不足以集費而起事而非芝泉太守持之以決格之以誠赴之以勇則又何以排羣議而輯衆志障狂瀾而奠民居也哉適余以校試來襄郡值其成功慶樊人之得水蒙其休澤也於是乎書

遵 旨查明據實繕陳疏 光緒四年

巡閱長江水師侍郎彭玉麟

竊臣承准軍機大臣字寄光緒四年八月初一日奉 上諭前據李瀚章奏湖北武昌等縣刁衿攔河築壩有礙水利等因欽此又承准軍機大臣字寄光緒四年八月初九日奉 上諭前有人奏樊口堤閘關係農田民命請飭覆加查勘等因欽此仰見 聖天子軫念民艱實事求是之至意跪誦之下欽服莫名 臣玉麟於八月初十日在瓜洲巡閱差次先奉八月初一日 寄諭當卽奏報起程日期並聲明先行密查等因拜摺後卽改裝易服搭坐民船星夜上駛於八月二十三日行抵湖北武昌黃岡兩縣所屬之樊口僱小划入樊口三十里餘卽築隄毀隄興訟之處該隄雖毀形跡猶存橫寬不過數十丈直寬亦十丈由此再進則名九十里長港屬黃岡縣者六十里屬武昌縣者三十里此港九十里內港汊紛岐旁通各湖如蔓繫瓜其右有洋湖魚湖月山

湖涇頭湖鴨兒湖江夏湖鰲洲湖等湖共十二湖其左有棖洲湖夏新湖三山湖保安湖等湖共六湖每年江水未漲之時各湖十餘里數里不等若江水盛漲由樊口入港右則薛家溝東港沈家溝等處灌滿各湖左則由楊澤溝會邱溝東溝等處灌滿各湖九十里長港盡頭處曰磨刀磯過磯始入梁子湖湖心有山有市鎮此湖於江水未灌時周環不過三百餘里而東西南北所通俗稱九十九汊東通武昌黃岡所屬之長港卽樊口港也西通咸甯興國所屬各汊北通江夏所屬各汊南通大冶武昌等縣所屬各汊而總匯出入之路則實在樊口捨此無路消瀉每年江水灌入各湖港汊不分一片汪洋濱湖各田無不變爲澤國周環則七八百里小民離流轉徙慘不忍言此樊口以內之湖河港汊江水浸灌之實在情形也查梁子湖各港汊兩岸皆平疇沃野農民賴以安業濱湖各州縣所屬田畝惟武昌縣十居其五各縣又分居其五以武昌縣犬牙相錯多毗連各縣故也而武昌縣之田畝又莫處於三坂曰上西洋坂中西洋坂下西洋坂此三坂人稱地寬俗稱九堡半若每年不被水災計堡耕種可播穀種三千餘萬石每石穀種如遇豐收可得穀十石有餘約計可收穀三百餘萬石又加各州縣所屬濱湖之田雖地有寬窄田有肥瘠綜計亦可收穀三百餘萬石而此六百餘萬石穀之收成全賴濱湖田地之不被水淹欲求濱湖田地之不被水淹全賴樊口地方之建築開壩無開則無堵禦而田淹田淹則弱者轉于溝壑强者流而爲盜賊有開則水有關攔而田熟田熟則農得倍收之利 國多維正之供此事利害甚鉅是非甚顯關係甚重然該處居民各執一說不盡以建開爲然者何也樊口乃魚米之鄉百姓謀生者有一二則有恆產者以耕田之業一則無恆產者以捕魚爲業耕田者惟恐江水內灌而禾稼被淹捕魚者惟恐江水不內灌而罟網失利利本相反勢不並存加以一築開壩則商販貨物有壅滯起旱之費此亦稍有不便處然以人數計之則耕田者十居七八捕魚者不過十之二三以 國課計之收田課則利

倍千百收魚稅不過千百之什一至於商販之壟壩更屬害之至輕者況樊口入湖生意大半皆由鹽雜貨分
 銷於江夏所屬之豹子灘山坡街賀聖橋等處武昌所屬之謝埠金牛鎮大冶與國所屬之保安街長嶺街碧
 石渡等處皆有陸路可通本不專走水路惟梁子湖心之梁子街一處不通陸路然自有湖內小划可以往來
 轉運倘因小有損于客商漁戶而舉數百萬生靈待食之穀年年付諸洪波巨浸之中因小而誤大得少而失
 多可以不煩言而解矣然而農民恆弱漁戶恆強農戶恆愚漁戶恆黠各湖濱業漁之處曰三山湖月山湖橫
 山湖銅山惟三山袁姓月山楊姓爲巨族該漁戶最稱豪強家有舉貢生監侍爲護符占奪大利袁姓楊姓一
 族所置田地皆在湖外不患水淹每年江水愈大則網魚愈多一築閘壩雖不失業而利則減矣漁戶楊辛葵
 楊鳴遠卽土棍楊光明等祇圖利己不顧害人勾結大治訟棍袁甲甫卽增生袁兆麟互爲爪牙倡議斂錢包
 告包准包挖橫隄盜借各人多名紛紛上控肆言恐嚇以聳堅聽而所有呈詞實出袁甲甫一手致令被水地
 方全家追呼饑夫尙在縲絏無怪各鄉農民恨袁甲甫刺骨皆欲食其肉而寢其皮也至胡炳盧汪懋沉向來
 皆係滋事之徒近年自知斂迹不預外事樊口內各屬百姓前因築成橫隄悉得豐收地方安堵自去冬挖開
 橫隄今春江漲漸入衆百姓逃生無路急於重築橫隄公請胡炳盧爲首汪懋沉副之胡炳盧頗懼招禍再三
 不允衆姓泣求救命始允出而興築萬人歡助每日千百小划拆廢屋竹木載廢隄磚石奔赴工次以期不日
 告成不使江水滿灌以救禾苗此實愚民不諳法律情急勢迫非真玩官藐法也當聞派水陸隊伍將往彈壓
 之時內有不識輕重之人譁稱隄不成不能活命隄成而毀仍不活命不如一鬥而散稍紓憤氣胡炳盧涕泣
 勸阻而耆老解事者亦皆戒其子弟不准妄爲自取滅族故官兵一到卽時散去否則禍變不堪設想矣以上
 各節皆臣玉麟草笠短衣親身查訪耳聞目覩異口同聲不敢妄參臆說輕聽訛言再四思維悉心酌度欲樊

口內各屬湖濱生命不能不修補老隄建築開壩所謂老隄者濱江黃柏山起至樊口四十里向有大隄足捍大江前面之水隄身漸已坍塌而隄脚尚屬堅結急宜趕緊脩補並須於黃柏山以上添修重許方爲有濟以該山上面尚有場口可以入水也樊口以內則宜修一石閘其橫直尺寸之寬廣可以度地布置惟堅宜建石閘斷不可築土隄土隄呆板而易於衝決石閘活動而便於啓閉如今年水勢本非常有但使春夏播種之時偶有淤患則江水與湖水消長隨時可以斟酌宜洩實爲兩全無弊之策議者或謂樊口內自古並無橫隄何以從前並無歉收之患不知山谷且有變遷何論江湖潮汐所激朝暮迭更情形迥異且咸豐初年從戎江上目觀江形遷徙淺深通塞不知凡幾不便泥昔日之成規誤目前之要務以須因時制宜方都委趙梁子湖一帶現近冬令水勢依然浩瀚居民多未歸業被水災區錢糧必須核實蠲免哀鴻滿地觸目興嗟既有可救之策不能不爲民請命上達宸聰至建築石壩後並應設立埠頭搬運貨物均由民間自行經理官則嚴立規條重懲需索此則地方官稍能盡心民事既可令行禁止決無流弊惟湖北有湖通江之口尚多而情形與此不同好事者不得援此爲例臣受恩深重懷遵無稍徇隱之處此次奉諭據實縷陳除訟棍袁甲甫楊光明二名由臣咨明湖北督臣李瀚章撫臣潘蔚嚴飭密拏務獲盡法嚴辦外其修隄建閘及被水災區免徵錢糧等事應如何分別辦理之處伏候聖裁飭下湖北督撫臣祇遵臣原擬俟前陝甘總督臣楊岳斌到此再行會同查勘一次頃接楊岳斌來文因其父病重業已奏明請假在案一時未能前來會勘臣未敢羈遲謹將臣玉麟遵旨查明樊口地方江水入湖之處必應修補老隄建築新閘以衛民田緣由恭摺由驛馳陳